

40. Reges diadematibus suis decoris venerabantur illius pedes, colore distinctos, de sella aliquantulum dependentes, neque vero scabellum aureum attingentes.

41. Ut gemmæ illi, quamquam parvæ, smaragdi nomen ob præstantiam suam haud falso imponitur, sic magni regis nomen etiam convenit illi, quamquam puero.

42. Quæ vox provenit ex illius, flabellis cincti, ore, in cuius genas duo cincinni dependebant, ea ne in oceanorum quidem litoribus evanuit.

43. Ille vultu ridente præditus, notam gestans in fronte, quæ fascia serica, auro pertexta, splendebat, hostium feminarum vultus eadem nota spoliavit.

44. Rex, *sirishæ* floris instar tener, oneroso ornatu defatigatus fuisset; sed dignitate sua gravissimum etiam terræ onus gestabat.

45. Antequam integrum alphabetum didicisset, cuius singulæ litteræ in humo scriptæ erant, e consuetudine cum viris sapientibus omnes morum doctrinæ fructus percepit.

46. *LAKSHMIS*, quæ nondum habitationem in pectore ejus invenerat, adultam ejus ætatem exspectans, præ pudore non nisi sub umbellæ umbra latens eum amplectebatur.

47. Brachiis ejus protegebatur terra, quamquam illa nondum *yugæ* modum adepta erant, neque ex arcus nervo cicatrices ostendebant, neque gladii ansam tetigerant.

48. Tempore progrediente non solum ejus membra incrementum capiebant, sed virtutes etiam, ab hominibus amatae, atque ejus familiæ propriæ, initio teneræ, amplitudinem adipiscebantur.

49. Ille nullam molestiam exhibens magistris suis, simul civium, qui patris potestati subjecti fuerant, imperium, atque tres scientias, quæ Honesti, Dulcis et Utilis acquisitionis fundamenta sunt, ita accepit, quasi in vita priore penitus eas cognovisset, atque nunc in memoriam solum revocaret.

50. Cum armis instrueretur, splendebat ille superiorem corporis partem leniter protendens, cirro in capitis vertice erecto, pedi sinistro innixus, arcumque sagitta instructum ad aurem usque tendens.